

山谷老人刀筆

六

山谷老人刀筆卷第十一

戎州一



與東川提奉先狀

伏審提奉太博肅駭使節來按屬城凡在指揮以
喜以惧其永投魑魅猶託光輝伏惟久患脚氣拜
起艱難不獲躬詣前道祇候參迎下情无任皇恐
之至謹具狀申聞謹狀

與東川提奉手書 五首

啓季冬極寒伏惟提奉太博尊躰動止万福即日
某蒙恩養疾所憂不能衣冠無階參覲下情无任
望風瞻仰之切謹奉狀起居不宣謹啓

又

再拜啓切惟道塗風霜使節憊冒良亦勤止即日
不審按部所至尊候何以澄清之氣凜然光被於
江山願篤行李以慰夷夏瞻仰小寒伏祈爲國自
重區區誠禱謹附承動靜某再拜

又

皇恐再拜某壘蔽樸愚未嘗得望履幙下重以負
罪竄逐強顏未死捐弃漂沒不當行李无階修敬
昨日親嫌迂置戎楚遂得潛伏蓬蓽爲部之民區
區常慮謫籍之塵垢點汚大旆之光輝以是久之
不敢通名於左右恭惟君子能及人之情知其心
危慮深終不以爲簡也某再拜

又

再拜某間居杜門蓬藿柱宇魁壘同逕寒灰槁木
不涉世事故非至親至舊可以通書及以罪譴點
污爲嫌者未嘗敢修賤詞以是待罪部下累月不
能作狀一道衰疾之迹万里投荒一身弔影其情
可察頭眩目昏書札不如礼伏惟高明仁慈尚能
寬之某再拜上

又

再拜某名在不赦之籍長爲明時弃物胥踈隱約
蓬蒿之下直偷生耳已无冠帶可從人間礼数但
有幅巾直敝僅自蓋纏不可以參謁使車之道左
請問舍人記室唯想望英風凜然聳平生頭見之
意耳切惟盛德之度可以存而不論言語復重蓋
老病之常態冒瀆清重竦仄无地某再拜

與戎州新守先狀

右某伏審知郡崇儀肅駟使節將次郊圻凡在部
下孰不欣慶某棄杖黽魅猶託光輝下情无任喜
至謹具狀申聞謹狀

與戎州新守手書四首

再拜啓當此風霜大旆衝冒良亦勤止恭惟弭節
江次起居万福此邦之民亦歌來暮願篤行李以
慰瞻仰時寒暴露伏祈爲國自重區區誠禱謹附
承勳靜十一日某再拜上

又

再拜某負罪未死捐棄漂沒不當行李未嘗得望

之民切以自幸區々嘗慮謫譴之塵垢點污大飾
之光華以是久之不敢通書於記室伏惟君子及
人之情知其操心危慮患深終不以爲簡也再拜
又
再拜閑居社門不甚預聞人事不欲煩公家借書
吏故非至親至舊可以致手書及以謫籍點污爲
嫌者未嘗敢通音問也以是密迹旧治不能作記
以道衰疾之迹蓬蒿塞門貧病在躬直可棄捨何
足爲長者道之勉強修敬頭眩目昏書札不如札
惟高明能貸之其再拜

再拜其名在不赦之籍長爲明時棄物隱約蓬蒿
之下已无衣冠可從人間札數但有幅巾直致僅
自蓋纏不可以參謁長吏之服終不敢拜迎前道
伏謁賓次切惟盛德之度可以存而不論冒瀆自
陳不寒而栗其再拜

荅瀘帥王補之計二首

再拜啓表弟盛推官來蒙賜教勤懇敬佩玉音无
有厭數審即日百福之會神明所相寢食具宜良
慰瞻仰傳聞進官再任之命已下伏惟權慶不惟
夷夏之民安樂中和之政歌弄於下小人亦得以
豐夥相依實自慰也小人於此一畝之舍松竹深
茂得以自藏死生之故付之造物更无他緣願无

嗜朝夕承教爲恨耳瞻望數舍臨書增情伏祈爲
國自重謹附承動靜

二

再拜劉公敬蒙薦引遂有成命蓋公衆得人材不
廢獨堯之賤矣欽歎欽歎公敏士大夫家子弟樽
俎談笑亦可觀至於幹公家則刃有餘地退而省
其私則安貧守節篤於孝友未易得者久備使令
乃知鄙語不妄李儒至江安旣寡過又繕完城壁
頗有功其意亦願出門下也若得在部曲尤見其
多能能輒妙於其事也陳傑被薦幸甚守法循理
又不矯激照映其同列誠亦難得逢具文聞於左
尤非特一日之雅渠已老於世事其爲吏長於督
察吏史姦伏之情若在幙府實稱職耳

三

續酒醋蜀紙真珠粉乳餅皆領每以口腹所須累
長者感愧无已西州紙乃有極佳者近方託人置
得二千許然不知其孔穴亦難置耳唯魚牋厚經
層冷金浣花大小屏風爲佳品比常市者其價略
倍也酒醋極爲用此州公厨酒大槩常薄甚則酸
澁民間時有可飲者不免少村氣耳乳餅亦佳此
富順眉州易得但多入米易酸真珠粉自是食中
有風味者某所作荔枝湯擘生荔枝肉別貯其自
然汁以水解白沙蜜漸入和合令味相得即并荔
子之皮煮減半以糝合貯之計客數人一勺人

令入湯小半盞煎泚用紗囊盛龍腦先撲熱盞乃
注湯餘甘湯餘甘用一種大如李皮皺肉黃赤者
沙盆中微擦去皮乃以摩薑汁鉢細摩人用水半
盞四人用炙甘草一寸同煎久之亦用龍腦撲熱
盞乃注湯大率人不過餘甘一枚真珠菜淨濯去
腥氣入葱白數寸椎薑一塊椒數粒泚湯綽過研
五味醃醋食之甚佳椶花剥去皮及莖幹取成塊
者湯中煮令熟煉麤油炒令香下葱薑椒醋水相
半煮泚微加鹽醬甚美比治二種菜食之殊佳護
錄上

又一

別來忽累月自以罪戾不復可湔被所過人視之
唯恐爲渠作祟故雖平居親愛能忘其不肖者亦
不敢以書通如長者之庭則未嘗不曷往也乃蒙
九月十日賜教存問勤懇感慰无量无緣瞻望臨
書馳情千万伏祈爲國自重以須進用

二

拙字不足觀辱過情之吝增媿令姪紙卷輒寫去
一笑耳此所居寺甚陋比於舍後作高木寮死灰
庵前後相當差明邃日与嘉州在純上座及唐道
人同齋粥向所苦心痛不作來六十餘日竟欲食
復似黔中時但脚氣不除時有頭眩膝中痛但妨
讀書及拜起耳於參道日向百不會者不爲大患
也蒙眷憐之厚故具之

又

再拜不聞嗣音忽逾月區區惟有懷仰即日天氣
亦小寒不審尊候何如惟慈惠決於民上下爰敬
府中无訟齋閣但文史歌舞之樂家庭詩禮雍雍
肅々神之聽之百福所會其衰病不損杜門似有
味萬事隨緣亦忘衣食之豐約小兒輩稍知讀書
有兩道人於此同齋粥耳有鄉人鄒好先者以鬼
谷五命遊兩川舊矣云有緣事至治下故輒付手
狀承動靜

比想氣躰益康強尚能劇飲否願勤衛生之經以
須不次之用

又一

頓首再拜奉三月朔教存問勤懇忽臂痛月餘未
能上報家弟來歸又奉四月十三日所惠書荷眷
憐之意无已自顧衰疾无所堪任何以承此嘉德
惟高明豈弟能厚往而不計其來軌量固如此耳
雖无前人風鑒之万一未嘗不深嘆伏也夏氣蘊
濁即日不審尊候何如伏乞爲國自珍以須不次
之召謹勒手狀

二

頃承損惠五米六酒四醢舍弟經過又煩濡沫公
養孤恤貧推惠甚博不肖每累公憂其單瓢棟仄
凍仄到戎一年雖未有生資然萬事隨緣少欲易
足家人亦能忘貧耳蒙左右眷矜之念故及之

又一

捕之知府安撫團練老兄閣下秋暑即日不審尊
候何如伏惟以義自將夷險一致飲食起居有神
相之承忽被旨罷瀘州所屬僻左未知其詳審爾
即當東去此在庸庸之情戚嗟若不可終日頃切
觀氣質仁厚神宇深靜事君之大節可與冰雪爭
明北叟之所以親倚伏惟明公曾中落故不復
憂之耳惟是無階參待不勝馳情謹承動靜

二

承欲漸解舟至王市治行盛暑良不易聞撫句廳
亦可少駐使節若俟治舟略有倫叙放船就江津
以待江水落似佳聞老兄囊中亦不豐然隨緣以
爲日用豈有闕耶子英皆賢想處之裕如也聞命
之初賢愚無不動心以爲老兄何以處之獨不肖
以爲不然夫物之成壞相尋如歲之寒暑有人喜
寒而惡暑世必以爲強疾人至於樂成而憂壞則
謂之有智不可也老兄鑒此必有餘不能忘情
故又之

又

皇恐秋暑方作旱災焚燄甚可畏不審比來寢膳
何似蘭亭詩偶寫得但揮汗臨紙研殊不能工耳
盛推不幸至於此其家倚盛德之蔭如震風凌雨
之得廣廈也然調護之功未畢迫公治行不識諸
幼皆得理所否人生危脆如此以此觀不安分而

多賢治生求与造物者争功豈不大感耶

又

稱拜亟得雨秋氣明爽伏惟燕颯萬福見所賜家
奉晦日書悉得日用輕安進退之際意慮淡然而
惟有欽嘆永治行日就緒何慰如之雖瞻候未卜
而數聞君子之音欣慰無斁謹奉丰狀承動靜

答王雲子飛中七首

頌首又欲作書與懶相遭頽然輒復過日竟辱惠
教先之不以罪廢無堪而奉之以礼意自視枵然
無所可用名在不赦之籍豈當得此共惟足下好
賢樂善之無已存心吉慶出於家風故爾即日霜
寒不審何如想侍奉萬福某塊然蓬蒿之下已忘
生死於榮辱實無所擇至於樂聞士大夫之好學
有忠信根本可以日就月將者則惕然動其心此
則餘習未除耳何時得款語尽道德之致臨書嚮
往千萬彊學力行為親自重

二

聞居杜門不欲煩公家情書更不能作牋以報公
銜之賜惟君子尺人之情去繁文而見其質也承
尊使君已授再任之命伏惟歡慶侍旁未有王与手
想昆仲相從講學日有光輝之益小兒輩過辱推
獎蓋樵鈍似厓厚不解事似有福耳亦謾令讀書
或與少識字可從仕耳餘書無法不足傳後世俗
浪謂之能亦自不可解誠有意書字當遠法王氏

父子近法顏楊乃能超俗出群正使未能造微入妙已自不爲俗書如蘇才翁兄弟王荆公是也雖然須要先探其本耳厚書甚有意於不肖遂發彊言回顧惟以赧然

三

陳履常正字天下士也讀書如禹之治水知天下之絡脉有開有塞而至於九川滌源四海會同者也其作詩淵源得老杜句法今之詩人不能當也至於作文深知古人之關鍵其論事救首救尾如常山之蛇時輩未見其比公有意於學者不可不往掃斯人之門古人云讀書十年不如一詣習主簿端有此理若見爲問訊千萬

四

相與既同草木臭味又有瓜葛故不復作牋差來枝葉皮膚枯朽剝落唯有心如鐵石益厭末俗文密而意疎也他日惠書願悉去表襮但作家書數行幸甚舍弟極道公家眷卹不倦之意嘉州文字若下計乘舟不日過此冀得少欸清論臂痛方小不能多書能照察否

又一

前日遣諸兵還寓書當已徹齋几即日暑氣益侵不審何如伏惟侍奉熙慶退食敏脩日用安吉子均子與相從講學有日新之功子茂所領甚冗亦得暇時來近文字不但恐尊酒謹浪費日多

耳其此无他得舍弟到眼前甚慰見輩亦隨緣令
讀書不欲迫逐之平生自不得此物秋毫力耳自
此欲弄筆研開藏經或未數書千万珍重謹勒手
狀

二

頓首不敢率易作尊公書因寢門問膳爲道小人
區區舍弟到家亦多病未能作狀也閩中進士鮮
澄自源自閩中來相過留此兩月許其人知書有
以自守某之友王蕃觀復今爲閩州節推亦稱其
家居擇交不妄與人游也遠來困於旅瑣欲謁薪
水之資於瀘州不知士人中有哀王孫者乎

又一

某頓首舍弟還家伏奉賜教長牋禮數過當非所
敢承別紙恩意勤重頓言行朽穢何以當雅与之
言耶即日暑氣熾煩不審何如伏惟侍奉万福所
苦况平得調護之力想氣躰飲食乃壯於未病時
也然更須以弟畏入畏爲念蓋人生血氣未定時
不知蚤服仲尼之戒故及其壯也血氣當剛而不
剛所以寒暑易侵耳孝道以身爲本不可不留意
斯事也尚阻會面臨風懷想千万爲親自重謹勒
手狀

二

承尊公仕官連蹇歲暮之節提然所望乃如蓬
固与憂樂俱生者也於其中自有簡擇取捨以

以忠厚則无悔摧毀太甚亦不可以独爲君子
所以理制情

又一

示諭作牋以爲不可廢之礼其義盖不然也古无
此礼近世李宗諤始以公狀施於私敬如先達王
元之楊大年其道德至今可愛敬凜然有大臣風
節者盖不用此礼也切嘗病世俗好爲苛礼知謹
故在高位而不可望以相知察者未嘗与書雖曩
時在州縣亦然其可望以相知察者亦不復修世
俗之礼也切意如子飛風度智術者可共此不疑
也

二

尊翁團練盛暑伏惟起居万福因問寢幸達區
承齋寢損膳以憂不兩惟至誠感動天澤必已霽
然耳盛推官逆旅之間禍故如此使人駭歎悲塞
不能爲心非願盛德之庇且覆溺不可知矣二女
長成若且守得此二事其餘皆易措手揮汗臨笔
硯書登不知礼故不敢上狀伏幸裁察

三

庭堅切聞尊公團練忽被旨罷瀘州計須待監司
交割乃得解印亦聞僦民舍迁止甚善然盛暑又
江漲水陸皆不便不審即日治行之策如何幸垂
諭所寄紙軸及尊公所要蘭亭詩子于紙軸皆寫
畢不欲付此據李初二日密上座决行並託調護

累日欲作書永安撫公動靜陰晴不常夜中取冷
太過晝則憤！以此竟未就至於懷仰之私與跡
殊不類也度必蒙見察耳忽！復通萬一

又一

再拜言君子不幸先公安撫使君奄棄明代聞問
驚坦不能處情地陷天崩永失依怙攀号不逮肺
肝摧絕荼毒痛楚何可堪任柰何柰何日月不居
亟更弦望追慕無異觸事隕心固極柰何孝思柰
何其抱罪裔土身不得前無緣扶服奉慰謹奉疏
悲塞

二

再拜善人宜極眉壽况於名教尤所勸勉士大夫
知與不知誰不嗟惜伏想子飛兄弟天地之情甚
篤當得辱割之苦何可堪任日月如積追慕則新
柰何柰何其屬以病目多以意緒無聊欲免作小
文以侑奠酌父之牽強乃成是以往弔獨後衆人
惟其忠實之情則在衆人之前仰恃哀察

三

承欲寓居襄鄧間漸謀生事似未安也以不肖所
商不若且止荆南荆南士大夫家頗有知義者以
歲月買田築屋使幹者以舟上峽稍稍化居時物
似為有理至都下雖有二十二驛其實半月從容
可到聞幹故未集尚須久留舊治所前已託劉奉
職道郵意餘朝夕更奉書也居喪哀為主而濟之

去并作書水尊公勳爵及附子均書也

四

再拜辱書動懇留秋來侍奉方福餘蓋不足言所
爲夙夜通勉子職以悅親者惟強幸所未知力行
所未至耳其餘隨緣厚薄可也願子親在堂而一
簞食一瓢飲不改其樂以道義事其親故也度吉
旦事速行到瀘亦九月初矣治裝尚從容水劑亦
安穩矣尚可數書因便風作記極草以千萬珍重

山谷老人刀筆卷第十二

戎州二

荅王季子予

三首

頓首辱書勤懇多病懶書恐不足副所以來
故久不能作荅往得暫見眉宇熟觀所惠書詞意
深厚蓋足下天資高明又居賢父兄珠玉之淵宜
其清潤光輝不資於人而自熾矣而求孝問道之
意常若不至古之孝大成者蓋如此固不肖无以
培益左右万一矣即日盛暑伏惟侍奉万福未緣
會集從容談笑惟彊孝自重

二

比來不審讀書何似想以道義敵紛華之兵戰勝
久矣古人有言曰并敵一向千里殺將要須心地
收汗馬之功讀書乃有味弃書無而游息時書味
猶在曾中久之乃見古人用心處如此則尽心一
兩書其餘如破竹數節皆迎刃而解也古人嘗喻
植楊蓋楊天下易生之木也倒植之而生橫植之
而生然一人植之一人拔之雖千日之功皆弃此
最善喻頽衰老終无益於高明子予以謂如何

三

承七月七日問喜承秋來侍奉万福仕宦之奇耦
倚伏之數公家父子既及之矣亦无可言者惟有
顛沛不忘問孝耳所惠書累幅勤懇老懶不能及
荅惟君子能盡人之情不以重戕疊記為恩厚也

所寄紙偶以書黏種鄙語且寄上符讀書城南他
日或作兩幅小楷字往矣數言无緣面會千萬強
幸自重

與甥王霖子均

頓首天錫泝流凡得三書今猶在城都所將
有所付但事未集耳往書軸出於草草不足觀傳
後他日有佳紙當爲作小行書數幅也適作書多
臂中以此作隱痛書不能一

六一

人來不得書承小失調護良耿耿想瀘南得雨後
差涼所苦亦已平表姊太君万福天錫家禍如此
閑處思之猶不可堪何況親當之者承已權窆必

四十二

二

如法然聞其家大小尚未寧夫人又欲便歸聞之
測然不知十九娘之瑣遂能如期來否宋三十七
亦鮮事更一寧之當此艱勤亦是人種陰功時也
府公非次罷歸賢不肖誰不嗟惜然此豈人事哉
此公老於世故存心忠厚有器度必非久困者今
西方須人材未必不因此出旋渦耳但恨不得一
往見盛暑既不可登陸水行又防江漲計須少從
容爲万全之計及行尚可三四奉書也秋暑能病
人萬爲親自重某頓首

二

承体中多不快亦是血氣未定時失調護耳少年
例多如此某二十四五時正如此病因服鬼絲遂

健啖耐勞今寄方去蜀中難得細粒兔絲至荆南
便可得也

兔絲子淘淨焙乾秤九兩準一勝用好法酒不
醱一升浸三日許日中曬時以醋令溼及酒薄攤
懸乾籠器貯之每日空心抄一匙溫酒吞下久服
不令人上壅服三兩月其啖物則如湯沃雪半歲
則大肥息矣真氣壅則少服麻仁丸可也往歲
常傳此法與京西李大夫其人服不輟昨任秘書
少監與同省啖物作勞如少年人也已七十四五
矣

又一

頓首禍變无常賢叔安撫使君奄存盛時聞問驚
但不能處情伏惟流落來依猶父之德當此大變
哀痛何勝奈何奈何表姊太君雖嫂叔之制禮所
遠嫌而賢叔孝友之義兼信常人想哀感亦不可
言日月不居逝者益遠永懷敦睦何時可忘千方
以前日之意照顧子飛兄弟衣食饘粥某頓首

二

兩辱書承表姊太君存問誨諭恩意千萬開慰无
量安撫公慈祥孝友忽然失之奉家皇皇於今未
寧子飛氣弱昨日又經大病恐摧毀太甚須垂意
調護之也子予父之愛子想哀毀亦不自勝惟以
禮節之耳趙市骨肉想時得書雙寓亦安穩不衰
聲謀居既舍舟出陸廢費已多又素无根基恐未

便得成就以老夫計之不若且止荆南借弟宅暫
居稍置田園物賤又有通水之便入郢及坦途轉
江又易爲力更從長相度頃病眼半月許方得少
愈鄉僕煎迫求歸適有便舟連日寫書眼復痛腕
幾欲脫作書極草草

又

辱書審雪寒侍奉万福爲慰知子飛兄弟居喪及
哀應禮甚副此想望之意但不知成都幹事使臣
能不於存亡之際有所負不力一不如人意乃門
戶交蹇時物理當尔亦不足計較也以今之勢且
百事隨緣省約并力於荆南之田爲三年伏臘之
計有餘亦可小作巴峽往來化居之策人生爲善
天不終困人耳无緣會面千方自重

又

霜寒即日想侍奉安常表姊太君當此百憂眠食
健否檀片卷子方寫得數行日爲索客踵門粥食
亦失時殊可厭倦寫得續求便并金剛經往矣留
使臣二日待文字竟寫不就甚愧草草 上報餘須
後信也

又

子均仁甥累辱書審侍奉表姊太君安固甚慰馳
情安抚公即世忽復見春永懷仁心義烈未嘗不
爲揜涕也况少孤遠歸方得所託而遽失嘉木之
蔭悲痛何勝耶扶護遠歸子飛子亨茫然在疚內

外事子均不可不悉心尽力也急發此書不能月
所欲言三兩日間遣曹安回當具之

與人

昨夕飲酒不多何以遂憊恐猶未起故不敢奉謁
少間能來對甚否偶得小詩謾遣至或可解醒耳

又

夜來飲酒不多何故遂憊如此欲煩公作炒桑蛾
葷冷淘漿水飯主人可乎早了縣事令眼前淨後
共飯乃佳耳

荅王觀復

頓首遠承遣介惠書勤懇勤懇三復增歎足下強
李博聞日新而不已小人負罪不得齒搢紳之末

三

刀十二

五

豈敢如所推獎且求博約琢磨之意但愧慙自汗
耳又每所稱道輒以不肖列於先達數公之間此
尤不敢當亦使足下品藻之論不信於時人也某
避嫌易地尚蒙恩貸戎州雖地熱春冬時作瘴疠
不如黔州地寒有雪霜風土宜人然米麥衣著差
易得如黔州士大夫亦有可与游者一裘一葛蔬
飯易足但為自東更移稍西儻舡泝流在道幾三
月不能不費耳過承致念故具之先公詩卷又得
熟讀高明溫潤有作者之風惜乎不得少發其蘊
見於世也輒以鄙語附驥尾或因此詩而傳後耳
見和東坡七言長短句及可惜騎鯨人去之語既
嘉足下好賢又深歎古來文章之士未嘗不尔也

章之 和成二章言无可采當面一笑耳鄙文一編
所得何其多耶其中亦多少時文字氣嫩語艱不
足存者此所无者謾鈔下以与門生兒姪輩彼所
无者亦有三分之一忽之未果錄去他日可寄也
但有樂府長短句數篇謾往遠寄縑緜紫紗戎州
地熱即用你暑服荷眷卹之賜也乍到未有佳物
可以爲報家園双井來乃分上聞足下飲食宴樂
出入車馬无不在於孝如此古人乃不難到更願
加求已之功沉潜於經術自印所得根源深遠則
波瀾枝葉无遺恨矣李長倩氣骨清秀但讀書泛
濫未能得其要得足下切蹉當有日新之功同僚
中復得佳士否所差人不綿歷北轅之楚失路而
啼幸門生胡斯立者見而憐之爲憒一閩人送來
留此錐多日日与三升米今問得自富順入資遂
由果至閩十五驛徒行不重戴十日可到二人供
給米三斗錢一千計不至餒於道矣異日或遣行
可并其乳媪來也欽想好孝之風无階面會臨書
增懷千万強孝自重九月八日

荅李長倩

頓首自發黔中遂不聞左右動靜忽得來教承攝
局在閩中去親庭不遠旦夕問安雖從吏事不廢
詩書驩喜无量王觀復佳士想相從甚樂興元關
在何時板輿肯同行就養否知命在涪陵逾歲
行日又留舍弟官所約九月來歸猶未得近音

如輩皆在此隨緣可過不資人力也今寓舍在南
寺乃當門闔中屋室差勝開元舊居但无復摩閑
江山之勝此亦有東禪在近城風物潇洒但須整
葺又主人為治南寺已成功固不欲謀遷東禪也
在純上座唐履道人於此同齋粥忽忘日月之逝
也相比得一少年与之共李已畧就緒相亦讀書
不費微知人前去年九月在涪陵生此男小字牛兒
風貌極魁出弓喜李語李行意氣已勝招殊魁眼
前伏臘隨所有為廣秋之度不求於人亦林下之
樂也別後故人惟楊明叔李問文章書札皆勝進
彭水行亦歲滿云當求此方差遺欲竟其李殊未
可量也比時苦心痛又眼又黑花以故作書不倫

刀筆卷三

七

不成字幸裁察相望數百遙臨書耿耿千万自愛
九月八日某頓首

谷南溪宰石信道人 三首

頓首放逐顛沛人所簡賤陰拱而窺三川之塗者
惟恐不肖之塵玷辱之也道出貴部而軒蓋奕奕
來願憔悴終日不懈功深嘆服意此邦鰥寡被豈
弟之澤深矣不有君子其能國乎奉別來忽復一
月病餘疲苾終未復常以是闕於修敬乃蒙示書
先之存問勤懃感慚无以為喻秋暑混濁似欲不
堪不審尊候何如伏惟万福謹勤手狀

二

相間南溪民淳事簡况君子居之以有以新其風

俗之陋邑廷清虛想時與僚佐同文字之樂諸郎
讀書亦有日新之功某寓舍无等雖无登覽江山
之勝得一堂亦且粗遣朝夕來禦魑魅處此蓋已
有餘俟他日私以稍力葺之旁近有禪子道人欲
相從寂寞者亦蔽其風雨而已

又

再拜忽承賜教累紙勤懇審邑廷虛閑時與僚佐
共樽酒之樂何慰如之惠鍛修甚珍小僚无不垂涎
也屢蒙一元大武之享而香篋翰音之献不登長者
之堂良以為愧頃間江次大風頗為災幸而比雨足象
成豐矣吾輩可以摩抄經笥飽湯餅也代者今在何所
稍涼到城中亦佳耳所諭懶書前言戲耳人生勤懶
各隨積習而成性懶亦好勤亦好此司馬德操法
也尚阻瞻對惟日為歲伏冀善眠食自重

乃筆卷二

八

答宋子茂殿直六首

頓首頃辱書審体力輕安為慰峨眉僧去繼奉書
皆徹兄案杏某寓舍已漸完使令者但擇二四人
差謹廉者耳既不出謁所與游者亦不多山野花
草微風動搖以此終日衣食所資隨緣厚薄更不
勞治也此方米麪皆勝黔中食飽飯摩腹婆婆以
卒歲耳間居亦強作文字有樂府長短句數篇後
信寫寄未緣會集千万勤宮自壽偷餘日近詩書

一

都下兄弟想常得安問木龍岩四旁稍引水猷令

正垣處兩過即乾亦佳耳子飛所須字凡寄三跋
馬往矣荔枝菴聞結構不甚加法若其中令用白
泥作小月床置四瓦墩菴後更搬去客土作七間
許小節屋繞之作茶藥寮之類亦便可宴安矣白
院主好修造而務要出已用勛打毬法使之无不
及力也楊道者極听人語略有智識他日參禪李
道必有立者欲有所改作更呼楊問之昨見寺中
合得辟瘴散味甚好試爲取其方寄示若有北來
裘求百十枚欲寄茶牙去適此人前迫書不暇但
寄得府公茶耳

又一

蟻首等書勤懇審比來日用輕安爲慰家弟經過
煩主札篤密感刻感刻惠墨甚副所乏榮紙謾及
之臂痛初不知其因姑用蒼梧膏及花乳石散皆
不効服烏犀丹透冰丹乃小愈意其老態百出平
生未嘗病風忽亦作尔然飲食不驟進四支不甚
腫膾亦是從來元風根耳今則十愈九矣但粥食
後輒思睡百事情懶意往而力不隨耳老於閑地
此疾不害事也子飛昆仲想相從勉讀書殊勝閑
談弄酒盞也未緣會集煩書懷想千万珍重

二

戎州通判戴景憲奉議其人清慎和粹年雖尚少
才老成之氣久与之游可愛也聞安撫司勾當成
素關亦聞王帥存心之美待官屬禮意周旋甚欲

法其下風計主人聞此君之義亦樂之但恐先有
求囑者已諾之耳不欲作王帥書因請事為達此
意

又

頓首比因還部兵奉書當徹几下盛暑少雨比來
日用佳否子飛子均子亭想數相見否每相聚輒
讀數葉前漢書甚佳人曾中久不用古今澆灌之
則俗塵生其間照鏡覓面目可憎對人亦語言無
味也不肖累日來意思極不佳初疑其欲作大病
熟思之乃是卧簾達旦夜中不加寢衣耳既而徹
簾數席少忍煩而加衣遂無恙恐鮮君到說累日
病故具之鮮君在閣中修謹讀書知意味者也以
故人書到此見其宗人其宗潤屋也治揚朱之術
故一毛不拔以此困於逆旅論三四平日與游者
乃能上道意整瀘人稍能薄濟之如何百冗草草

又

頓首兩辱手誼永病起及今乃安和矣能以覆轍
兢兢如此即是萬全安樂人矣人生以身為本其
餘於我何有自今可研物理求道術否王帥之去
民有甘棠之思而門下之士失嘉木之蔭想亦耿
耿不易平也或聞有理之者真或便得一闕耳未
緣會集千萬珍重

與試官李正孺

再拜待罪魑魅之域衰疾無所堪任幅巾直致不

可以謁長者之門雖聞車馬到城不能一參候乃
蒙辱顧訪不倦無宜得此但愧畏耳晚來暑氣不
解不審飲饌何如承來且遂成行願道途珍重謹
勒手狀

與試官蕃子敦

再拜某罪垢汗辱人所鄙賤重以衰疾眩冒不能
復從人事諸賢到城竊有望見顏色之願而無由
乃蒙謙光照曜陋巷非所當得惟有愧恐承來且
遂成行秋暑未艾頭加珍重以慰馳情

與試官王君宜

再拜捐弃漂沒不當行李雖後密迹無階修敬伏
承以王事到城屈顧陋巷恩意勤懇自視缺然何
以得此惟愧悚耳秋暑尚爾不審晚來起居何如
衰疾不能一詣館以謹奉狀不敏伏惟照察

